

LETTRE DV

PERE CHANTRE DVVE

de l'Oratoire, au Cardinal
de Richelieu

A NANCY,

Par H. Vilior, demeurant rue des
Artisans, à la Ville Neuve.

M. D C. XXII.

Vol. 17

Case

F

39

326

THE
LIBRARY

1631c

Journal

of the

...

...

...

...

...

...

...

...

...

...

...

...

...

...

...

*Lettre du Pere de Chantelouue de l'Oratoire,
au Cardinal de Richelieu.*

MONSEIGNEUR,

Il court depuis quelque temps vne lettre dans Paris, laquelle vous auez escrite à la Reyne, Mere du Roy, ce me semble trop insolente & contraire à vos actions, que ie m'estonne qu'elle soit demeurée iusqu'à present sans response de sa part, affin de rabattre ceste presumption, & diminuer le mespris que vous faites d'une si grande Reyne, qui par excès de bonté, & de trop facile créance, se voit aujourd'huy reduite en pire condition qu'un Esclave, & bien esloignée des termes dont vous luy escriuez; Mais ayant sçeu qu'elle n'a paru deuant ses yeux, & que vous n'avez eu autre dessein que de la donner au public pour desfigurer la verité, & couvrir vos fourberies, trop foibles toutesfois pour combattre son innocence; Je me suis résolu d'y respondre sans passion, ny interest, mais seulement pour repousser vos flatteries mensongeres, & vous donner celle-cy, au lieu d'une qui par vostre inuention court à Paris sous mon nom, laquelle ie n'ay iamais pensé de faire. Je veux des-abuser les plus grossiers, qui n'ayants l'entiere cognoissance des affaires, pourroient adjoûter foy à vos artificieux discours, & aux fautes dont vostre Lettre est composée. La plainte que vous faites d'auoir esté déchiré auprès d'elle, est autant esloignée de vostre cœur, que hors de propos, puis que par tous vos déportemens vous auez trauillé comme on voit à la perdre & à la ruiner en l'esprit du Roy son fils, pour y prendre sa place dont elle s'est appesuy trop tart; & qui pis est, en vn temps où le mal estoit sans remede,

comme les affaires le font voir clairement. Ses bien-faits auoüez de vostre bouche, & vostre prud'homme bien déguisée, luy estoient toute sorte de meffiance; mais apres la cognoissance de vostre fausseté, elle s'est veüe contraincte de vous congedier de sa maison, estant fort iuste de se deffaire d'un mauuais & dissimulé seruiteur, qui par faux rapports auoit chassé les siens pour y en establir d'autres à sa poste, & attiré à soy tout ce que la liberalité du feu Roy son seigneur, & celle de son Fils luy auent acquis, & de trois cent mille escus de plus, dont vous l'avez laissée endebtée. Il n'y a personne qui sçache mieux que vous, la raison pour laquelle elle vous a esloigné; Mais vous plus fin, avec la plus noire & infame ingratitude dont lon ayt ouy parler, abusant de sa bonté & facilité, apres vous estre rendu maistre des affaires, avez pris vne si prodigieuse puissance sur l'Esprit du Roy, que le faisant consentir à vostre effrenée passion, vous l'avez separé de la Reyne sa Mere, autant d'intelligence que d'affection au grand estonnement de la Chrestienté. Vous l'avez fait arrester prisonniere dans le Chasteau de Compiene entre quatre murailles, où vous la faites garder par mil hommes de pied, & trois cents cheuaux, n'ayant pour tout proumenoir que soixante pas de rampart de la Ville, muré des deux costez, & garny de sentinelles nuict & iour. Voila vn commencement de iustification que vous faites, & vos deportemens font le triomphe de vostre innocence, dissimulant au Roy sa prison, & le déplorable estat auquel elle est. Pensez-vous aisément faire croire au public, que les Apostils que vous avez faits vous-mesme à la Lettre de Monsieur, Frere unique du Roy, imprimez par vostre commandement, qui portent que le Marechal d'Estrée n'a eu autre ordre que de prier la Reyne de la part de sa Majesté d'aller en la maison de Moullins, vous puissent lauer? il ne falloit

Pas

pas tant de gents pour l'accompagner, portant ceste parole à vne femme, ny les y tenir depuis, comme vous faites encore à la ruine du pauvre peuple, dans vne année si necessiteuse. Dittes la verité, pourquoy l'avez-vous esloignée d'auprès du Roy ? C'en trop déguiser la matiere, les gents de bien cognoistront avec le temps que vous n'avez mis la Reyne en prison, & contrainct Monsieur de sortir du Royaume, pour aller trouver seureté de sa vie dans les Maisons Estrangeres, que pour demeurer absolu Maistre de la maison, & acheuer sans contredit le dessein que vostre ambition naturelle vous a fait projeter dès long-temps, de rétablir en vostre personne la charge de Maire du Palais, supprimée dès la premiere race de nos Roys, dont si n'avez aujourd'huy le tiltre, du moins en avez-vous la fonction & jouissance entiere ? Qui vous empeschera, puis que par vostre tyrannie vous donnez ordre que les iustes plainctes de la Reyne & de Monsieur, ne soient entendues du Roy pour le détromper, & luy faire voir clairement vos pretentions insupportables, à la honte & au mespris de ceste France, autres fois fleurissante ? Quelle violence n'apportez vous pour empêcher que la plainte du Frere du Roy ne soit ouye dans le Parlement ? Il vous est impossible de nier, que vous n'ayez entre vos mains, & de vos Creatures, les plus importantes places du Royaume, les Vaisseaux de Guerre, Canons, Munitions, Sallines, qui est le principal reuenu du Royaume, & tout l'argent exigé sur ce pauvre peuple, par Impositions, Subsidies, & Edicts, lequel aussi-tost leué par ceux qui vous seruent aux affaires des Finances, est mis en seureté dans les Places & Citadelles rendues impre- nables par des immenses despeses qui sont aujourd'huy la ruine du peuple, & la nécessité qui paroist dans toutes les Prouinces. Cela vous touche peu, pourueu que vos Coffres soient plains, & en seureté dans vos

Places. Il n'y à point d'homme si peu iudicieux dans les affaires, qui ne iuge bien que vous vous mettez en estat de vous desfaire du Roy, comme vous avez fait de la Reyne sa Mere, & de Monsieur son Frere, quand il vous plaira, & lors que vostre dessein que ie tais maintenant par discretion, lequel vous poursuiuez par toute sorte d'inuentions & artifices, sera au poinct que vous le demandez : Au moins estes-vous en estat de le despouiller d'une des meilleures parties, si le Souuerain Protecteur des Personnes Sacrées n'y met la main? Ne vous imaginez pas que les flatteurs discours de vostre Lettre, ny toute la Rethorique que ce malin Esprit vous a peu fournir, vous oste iamais la qualité d'ingrat & de traistre, mentionnée en icelle : vous ne la perdrez iamais, quoy que fassiez, l'ayant acquise trop iustement. Ce pourpre de l'Eglise, dont elle vous a reuestu par vostre confession, est maintenant terny d'une si noire couleur, que ie m'estonne comme Dieu dilaye si long temps le chastiment deû à tant de perfidie & d'audace. Ces protestations de fidelité & d'affection, aussi trompeuses que belles, & le dessein de ceste reputation dissimulée que vous desirez porter à Rome, s'accommode fort mal avec vos actions : vous péfiez bien, faisant équiper & mettre en ordre les galeres, r'enuoyer la Reyne en Italie, comme vostre ame lasche le desire; Le voyage de Moullins n'estoit pas pour autre sujet; Vous avez trop bonne part en France pour l'abandonner, aussi bien vos fourberies sont plus cogneuës à la Cour de Rome qu'en celle de France. Le Cardinal Baigne, homme de bien, & sans reproche, a sans doute représenté à sa Sainteté, avec verité vostre ambition desreiglée : laquelle est venuë à si haut poinct, que la chaire de Saint Pierre ne suffiroit pas pour la borner; Si vous duriez long-temps vous acquereriez sans doute cét effroyable nom de flean de Dieu

Dieu en France, qui fut donné à Attela, quand il fut
 deffait lors de l'establissement de ceste Monarchie;
 Elle a commencé de son temps, & si Dieu ne nous pre-
 serue de tant de malheurs (que nous ne pouuons éui-
 ter sans son assistance) elle finira au vostre. Vous n'a-
 uez garde d'auoir la diuision de la Mere d'avec le fils,
 & du frere d'avec le frere, elle est trop odieuse deuant
 les hommes, pour confesser d'auoir separé ce que Dieu
 & la nature ont joint; Vous voulez que ceux qui ont
 cognoissance de vostre malice noire, & qui ne la peu-
 uent regarder qu'avec des larmes de sang, passent pour
 calomniateurs & perturbateurs du repos public; Vo-
 stre marchandise est éuentée, elle n'est de mise qu'au-
 pres du Roy, que vous tenez assiégué, luy ayant osté ses
 bons & fidelles seruiteurs, & tellement intimidé les
 autres, que personne ne luy parle plus d'autre lan-
 gage que celuy dont vous donnez la Tablature. Et
 qui découure plus apertement vostre mauuais dessein,
 c'est d'auoir avec serment exigé du Roy de vous dire
 entierement ce qui luy sera dit contre vous, mesme
 dans le Sacrement de Confession. Quel sujet auiez-
 vous de luy faire changer de Confesseur? c'estoit de
 crainte que le bon Pere Souffrant n'eust dessillé ses
 yeux, luy faisant cognoistre vostre ambition démesurée,
 ayant veu les choses qu'elle a causées, & cause encore
 tous les iours à la France: Vous en avez pris vn autre,
 ignorant en ceste matiere, qui sera long-temps à des-
 couvrir vos fourbes, & par ce moyen le temps s'escou-
 lera. C'est pour nos pechez que Dieu permet que le
 Roy ne cognoisse pas ses maux & les nostres: mais il
 faut esperer que par sa grace il les luy fera cognoistre,
 affin d'y pouruoir, & au soulagement de son peuple, en
 nous tournant visage & arrestant le cours de ceste pro-
 digieuse Fortune. Le dessein de vostre Lettre n'est que
 pour les plus simples, affin que dans vos soubmissions
 imaginaires

imaginaires lon croye qu'il ne tient pas à vous que vous ne soyez r'accommodé avec la Reyne: vostre intention en a tousiours esté fort esloignée, quoy que dès le lendemain de la rupture vous auez fait semblant de le desirer. Ces moyens là sont trop foibles pour en laisser la creance au public, ny que les horribles violences que vous faites executer tous les iours, vous soient permises sans qu'on y puisse trouuer à redire; Vos tours ordinaires sont de frapper en vous humiliant. Je suis de tout le Royaume le moins interessé, & de condition qui n'a aucun besoin de biens, obligé à la verité à la Reyne Mere du Roy, de quelques bien-faits, mais principalement de ce qu'elle a engendré à la France son fils, que Dieu luy conserue s'il luy plaist. Je ne dis tout cecy que pour l'affection que j'ay au bien de ses affaires, & soulagement de ses sujets, qui souffriront sans doute vne grande alteration, s'il n'arriue vn prompt changement pour destourner les mauuaises influéces qui nous menacent de grands malheurs, si vous ne vous amandez. Je prie la diuine bonté qu'elle vous en fasse la grace, & que vous vous seruiez pour vostre proffit & pour celuy du public, de l'aduertissement que vous donne,

MONSEIGNEUR,

De Nancy ce 20. May, 1631.

Vostre très-humble, &
très-affectionné seruiteur,
I. DE CHANTELORVE.